



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

Tir Yimym

tiryimym@aolima

tir yimym

TAPAK 8

Imran Khan court nung nokdak;
nisung noklang aika apu

Season tembangba sülen
Busquets-i Barcelona toktsütsü

VOL. XX NO. 208 (ADOK 208)

DIMAPUR

YANGTEPNÜ (THURSDAY)

MONUPII (MAY) 11, 2023

₹ 5.00

CM Biren ajanga Manipur nung mepetmesü adok: RPP

Dimapur, May 10, 2023 (TYO): Manipur nung Meitei nung aser Kuli lisopurtem tsüngda mepetmesü adokba ya Chief Minister N. Biren Singh ajanga lir, ta Rising People's Party (RPP)-i metetdaksüogo.

July 9, 2021 nü Chief Minister Biren-i ali ajak state sorkar meyong lir ta ashi aser iba ajanga pai pa ya Imphal Valley indang Chief Minister dang lir ta sayu. Ajisiuaka iba sülen pai Kuki nung aser poppy lu ayimertem aser drug warlords ta sensatsü aser tatem nung ozüing alema arurtem ta sangoktsü.

Biren Singh-i Kuki nung aser poppy lu ayimertem lir ta ashiba ya aibelena jembiba lir kechiyong Naga nung aliba district tem nunga poppy lu ayimer. ST list nung Meitei nung adentsüba anema noktakba ATSUM kübok Naga nungera dena lir. Maneni Naga nung teimba ser aliba Ukhrul, Senapati, Chandel aser Tamenlong district temia May 3 nü ATSUM-i ayongba rally nung shilem agi saka Kuki nung dak dang tenük yoka mapa tamajung inyak, ta RPP-i sangdong ka nung ashi.

Nisung temeyoktep aliba Imphal valley nung Kuki nung dak dang tenük yoka mapa inyak aser iba ajanga Kuki nung anema

inyaktsü jenlia tasa yangluba kuli sayur. May 3 nü mepetmesü tenzük saka Manipur Chief Minister-i ghonda 24 tashi kecha meinyak aser iba mapang ya Imphal valley nung nisung teloktemi Kuki nung kiojen aser tenla kitemraksatsü, ta RPP-i ashi.

Osang angazükba agi nisung teloktemi Kuki nung kiojen rongdoktsüdang Manipur police commandoes-i parnok yari. Ano, May 4 nü Kuki nung Manipur DGP P. Doungel IPS ket nungi mapa ajak agien aser ADGP Ashutosh Sinha IPS nem mapa ajak agütsü saka Doungel nungi mapa agienba indang kuli kecha magütsü. Talisa Sinha-i Security Advisor, GoM, Kuldiep Singh nem osang agütsü, ta RPP-isa metetdaksü.

Manipur nung tensa mejungi akümba atema Chief Minister N. Biren Singh-i menden toktsüsüla aser pa lenisüba kübok yimjung bener marutettsü. Manipur nung tashiyim inyaker ajak pua merenshitsu atema President's Rule benoktsüla, ta RPP-isa ashi.

Maneni, Hindi oshi jembirtemi Manipur nung Khristan temi Hindu nung tepseter ta Christian Kuki Vs Hindu Meitei onük tiyazü adoka jembiba ya khukhua aitsür, ta Rising People's Party (RPP)-isa metetdaksüogo.

Karnataka: Congress nem takok tuluba agütsür saka 'hung assembly' asütsü akok

New Delhi, May 10, 2023 (Agencies): Karnataka assembly election atema exit polls 10-i 'hung assembly' asütsü ta asadangtetba osang metetdaksüogo.

Külen, exit polls 3-i Congress aser kati BJP ajanga sorkar akümtsü menden peria angutsü ta asadangteta lir.

Karnataka nung 'hung assembly' asütsü akok ta asüba exit polls ajanga HD Kumaraswamy'er Janata Dal Secular ajanga sorkar akümba nung tongti shilem agitsü ta ashir.

Züngsem 224 agi akümba Karnataka assembly nung

majority mark ji menden 113 lir. Ajisiuaka, News Nation-CGS-ibo BJP nem takok agütsür aser Suvarna News-Jan Ki Baat ajanga BJP asoshi upper limit 117 ta asadangtetogo.

Karnataka nung BJP-Congress-JDS tsüngda toktepa polling tanü nikongdang tembangogo aser Honibarnü votes azüngtsü.

2018 küm BJP nem sorkar mekümdaktsütsü atema Congress aser HD Kumarasamy'er JDS tsüngda tesentaktep yur toktepa sorkar aküm. Ajisiuaka küm ka shi ka dang lir telok anaprong nungi

MLA temi BJP nung adenba ajanga sorkar loksa aser BJP-i sorkar aküm.

2006 nung Kumaraswamy-i BJP den tesentaktep ayu saka küm ka majungdang iba sorkar loksaba sülen President's rule liasü.

Kumaraswamy-i BS Yeddiurappa nem Chief Minister menden agütsütsü memulungba ajanga sorkar loksa.

2023 Karnataka assembly elections nunga exit polls balalai JD(S) ajanga menden 14-33 tashi nung takok ngua taruba sorkar aküm nung tongti shilem agitsü ta asadangteta lir.

Manipur nungi civilian 553 Kohima tonga aruogo

Dimapur, May 10, 2023 (TYO): Manipur nungi Naga nung nung civilian 553 tashi Bodbarnü Kohima tonga anir aruogo.

Iba mapa ya Nagaland sorkar, Assam Rifles IGAR (North) aser Nagaland Police külemi yaritepa inyak.

Tanü anir aruba civilian 553 rongnung Konyak nung 261 dena lir.

May 8 nungi "Operation Kohima Calling" tanabuba shilem

tenzüka liasü. Iba ya Col Umesh Sati, Commandant, 1 Assam Rifles lenisüba kübok inyak aser mezüngbuba shilem nung Imphal nungi civilian 676 anir arua liasü.

"Civilian 553 rongnung tanga state tem nungi nisung 50 aser Konyak nung 261 dena lir" ta Maj General Vikas Lakhera, Inspector General IGAR-North-i osangbener dang ashi.

"Manipur nung Nagaland nungi nisung teimbaka anir

aruogo aser tang tashi nungbo teyari meshir shinga mali lir. Ajisiuaka, nisung kari danga teyari meshira onoki anir arutsü" ta Maj General Vikas Lakhera-isa ashi.

"Operation Kohima Calling takok ngua tembangogo. Iba nung Assam Rifles, State sorkar, Nagaland Police, Nagaland Transport, CSOs, APO, Konyak students Union, Konyak Union ajak densema lir" ta Maj General Lakhera-isa metetdaksü.

NE nung ali ketdangsütsü atema task force ka tentettsü

New Delhi, May 10, 2023 (Agencies): North-Eastern state tem nung ali ketdangsütsü atema Centre-i task force ka tentettsü ta Bodbarnü Union Rural Development Ministry-i metetdaksüogo.

May 3-4 anogotem Guwahati nung "Land Governance in North Eastern States" indang National Conference nung iba lemtet agi.

Assam, Tripura, Mizoram aser Meghalaya nung territorial aser autonomous district councils ajanga land records digitisation aser modernization asütsü atema jembu.

Iba mungdang nung land records indang modernisation, land governance assessment framework aser customary & indigenous laws indang onüktem benoka lemsatepogo.

"Assam kübok tanga tesemtem nung land records aser maps computerisation & digitization mapa junga inyaker saka Bodoland Territorial Council, Karbi Anglong Autonomous District Council aser Dima Hasao Autonomous District Council nung metokmeperi aika lir" ta Rural Development Ministry-i ashi.

Bodoland Land Policy renemdar aser kobi melii iba maparen tembangtsü ta parnokisa ashi.

Karbi Anglong tesemtem survey aser settlement meinyak lir aser Dima Hasao Autonomous District Council-i Assam Land Regulation Act adopt süogo. Ali aika non-cadastral area lir aser item tesemtem jungunga survey asütsü nüngdaker ta Ministry-isa ashi.

Tripura Tribal Areas Autonomous Council nung district 8 lir aser Sixth Schedule o 10 customary laws kübok ali tasazük 10,000 sq km lir. Sixth Schedule indang Lai Autonomous District Council areas survey/resurvey asütsü nüngdaker, ta Ministry-isa metetdaksü.

Meghalaya nung Khasi Hills Autonomous District Council kübok ali teimba ka lokti meyong lir. Garo Hills Autonomous District Council nung kümshia District Council ajanga Annual Pattas agütsür. Külen, Jaintia Hills Autonomous District Council-ibo Meghalaya Land Survey and Records Preparation Act 1980 sülen anidaker, ta parnokisa ashi.

"North-Eastern states nung Autonomous District Councils ajanga parnok indang land records digitise aser modernize asütsüla aser akokba tashi Councils yaritsü" ta Department of Land Resources Secretary Ajay Tirkey-i ashi.

Bodoland Territorial Council-i land records indang digitisation aser modernization atema shiogo aser ibaji Department of Land Resources-i agizükogo ta paisa ashi.

North-Eastern states nung aliba Autonomous District Councils den asüngdangtepa aser bangdakpurtemi mulunga agizükba sülen Department of Land Resources-i North-Eastern states atema Task Force for Land Governance ka tentettsü, ta Secretary Ajay Tirkey-isa sangdong ka nung ashi.

Iba mungdang nung Assam nungi Bodoland Territorial Council, Karbi Anglong Autonomous District Council, Dima Hasao Autonomous District Council, Tripura nungi Tripura Tribal Areas Autonomous Council (Tripura), Mizoram nungi Lai Autonomous District Council aser Meghalaya nungi Khasi Hills Autonomous District Council, Garo Hills Autonomous District Council, Jaintia Hills Autonomous District Council aden.

Iba sentong ya Lal Bahadur Shastri National Academy of Administration, Mussorie aser Department of Land Resources ajanga ayongzük aser Revenue Department, government of Assam-i yaritep.

BAN-i mezüng Dawki land port amshi



Dimapur, May 10, 2023 (TYO): Business Association of Nagas (BAN) tir L Mongkum Jamir-i anir teshimtet telok kati May 5, 2023 nü Dawki land port nung anenzükogo. Iba ya Dawki land port nung business group mezüngbubai anenzükba lir.

Iba land port ya India aser Bangladesh tsüngda international border anasa West Jantia Hills, Meghalaya nung lir. May 4, 2023 nü Union Minister Nityanand Rai-i iba land port lapokja liasü.

Dawki Land Port ya India aser Bangladesh atema kanga dang tongtipang rongsenketzüng aser transportation hub ka asütsü.

BAN teshimtet teloki India arrtsü adena aoba sülen India-Bangladesh Chamber of Commerce and Industry Secretary General Abul Kalam Azad-i parnok pelashishia agizük.

BAN-i Tamabil Limestone aser coal importers group aser

Meghalaya International Exporters Chamber of Commerce president Dolly Khonglah nung den ajurutepa senden ka amen.

Nitol-Niloy industrial park nung Nitol-Niloy Group chairman aser IBCCI president Abdul Matlub Ahmad-i BAN teshimtet telok pelashishia agizük aser parnok dang industrial park aser facilities sayu.

Nitol-Niloy industrial park nung Sunamgan Chamber of Commerce and Industry den senden amandang MoUs 10 nung sign sütep.

Züngsem 12 adenba BAN telok ya anogo pungunü atema Bangladesh semdangi oa lir. India-Bangladesh Chamber of Commerce and Industry-i jaokba atema parnok ao aser parnok den Nagaland sorkar nungi Ababe Ezung OSD (transport), Civil Aviation, Railways & Inland Waterways dena lir.

Advisor Konngam Konyak-i Archaeological & Heritage Gallery semzüksü



Kohima, Monupii/May 10 (TYO): Advisor, Art & Culture and Treasuries & Accounts, K. Konngam Konyak-i archaeological survey aser museum tem ya kanga tongtipang aser item yagi nūburtem indang puti otsü aser sobaliba wazūka ayur, ta ashi.

Tesüiba mapang indang angatetsü atema alimai archaeology nung temolung agütsür, anungji Naga nung archaeologist aser archaeological department-ia Naga nung den apet survey agütsüla, ta pai ashi.

Naga nungeri archaeology nung temolung agütsütsüla, kechiaser iba ya ajanga tesüiba mapang takum lidaktsüba nung yarir aser puti otsü, sobaliba aser yimsü-yimbong kumzūka ayur, ta Konyak-i ashi.

State Museum, Directorate of Art & Culture, Kohima nung Nagaland indang Archaeological & Heritage

Gallery semzüksüba sentong nung jembidang, archaeology ya kanga tongtipang lir, kechiaser iba yagi tesüiba mapang nūburtem aliba aser tatalokba kuli agüja linük aser nūbur kumzūka ayur, ta ashi.

Museum ya kanga tongtipang lir, aser nisung aser yimtsüng aikati artifacts medeni museum yanglua sen agütsü meranger, anungji nūburtemi ochi nung inyaktsüla, ta pai ashi.

State Museum nung aliba Archaeological & Heritage Gallery nungi ajaki jenjang aketba shisatsü angutsü imlar, ta pai ashi.

Iba sentong nung Commissioner & Secretary, Art & Culture, Athel O. Lotha-i ashiba agi, State Museum ya reju ka amau lir, kong Naga nung libaliru yimya, sobaliba aser amangbatem sayur.

Archaeology ya tesüiba mapang amshiba osettsüset tem bushiteta angatetba indang lir

aser iba yagi akhi mapang indang angatetba nung yarir, ta lai ashi.

Iba gallery nung ali nungi tutetba otsü aketba osettsüset timba lir aser zülutsü maliba mapang indang osangtsüsang agütsür, ta ashi.

Nagaland University nung Department of History & Archaeology nungi Prof. Tiatoshi Jamir-i ashiba agi, gallery nung Nagaland indang pre-colonial aser pre-history sayur.

Gallery aliba osettsüset ya aliba masü saka yimtsüng aser kijai tenla agütsüba mesüra ali nungi tutetba lir, ta pai metetdaksü.

Iba sentong nung menden Art & Culture indang Joint Director Merensola Longkumer liasü, Central Baptist Church indang senior pastor Neichalie Chadi-i sarasadem aser Director, Art & Culture, Adelo Moa-i melepzüng o jembia liasü.

Mokokchung nung Tribal Artisans Mela ayongzüksü

Dimapur, Monupii/May 10 (TYO): Tribal Cooperative Marketing Development Federation of India Ltd (TRIFED) ya Ministry of Tribal, Government of India kübok national level cooperative society ka lir aser India nung tribal kintem socio-economic renlokdaaktsütsü nükjidong nung tribal osettem ayoktsü aser renlokdaaktsütsü mela lir.

Scheme tasenba "Marketing and logistic development for promoting tribal products from the North Eastern Region (PTR NER)" sentong nung shilem ka

ama TRIFED ajanga Mokokchung HQ nung May 12 & 13, 2023 anogotem Tribal Artisans Mela (TAM) ayongzüksü.

Iba Mela ya ajanga local artisan tem pei sempet aser mapa sayutsü maangka agütsütsü. TAM nungya Meta Craft, Cane & Bamboo, Jewelry, Gift & Novelties, Textiles, Terracotta & Stone Pottery, Painting, Organic aser natural products tem sayutsü.

Jangra aliba artisans (cooperative societies/SHG/ kija) tem iba Mela nung shilem

agütsü ayongzükter, koba Town Hall Mokokchung nung May 12 & 13 anepdang 10:00 ako nungi tenzüksü. Tejangrar temi 9774616981/8730901253 nung May 11, 2023 nikongdang 4:00 ako tashinung tenung agütsütsüla.

Sendaktepa aliba department - MARCOFED, NSRLM, Cooperation, ATMA, LRD, KVK ajanga shilem agütsü tenung agüja alirtemi tenung tanaben agütsütsü menügdak. Iba mela ayonger shilem agirtem nem TA/DA agütsütsü.



Assam Rifles temi Mon district kübok Changlangshu yimdaak May 10, 2023 nü yirur aliba nisung ka nem teyari agüja liasü. Iba nisungba nem MI room nung first aid agütsüba sülen District Hospital Mon bushia anir ao.

Chumoukedima DPDB senden menogo

Dimapur, Monupii/May 10 (TYO): Advisor, Urban Development and Municipal Affairs, Zhaleo Rio mendenpuba sür May 10, 2023 nü Deputy Commissioner, Chumoukedima indang Conference Hall nung Chumoukedima District Planning & Development Board senden mena liasü.

Iba senden nung jembidang DPDB mendenpubai department ajak dang jembishinü nung sadok-sayima shilem agütsü aser danga department tem nema pei department indang metetdaksütsü ayongzūka liasü.

State sorkar kübok Chumoukedima district nung inyaktsü ya khuret tulu lir aser iba atema mapa meteta inyaktsüla aser nūburtem asoshi temoatsü ka-ka asütsüla, ta pai ashi.

Chumoukedima ya 'Land of Opportunity' ta shimteta lir asünung, department ajaki pei sentong nung maangka aliba amshia mapa inyaktsü yimya süpatsüla aser nūbur tenzükba

nung department ajak nungi amalitep akatsü imla atar, ta Advisor Zhaleo-i ashi.

Iba senden nung parnoki taoba DPDB senden nung lemtetba tem lepa reprangshia Dhansirpar Sub-division kübok Shikato yimtsüng recognition atema taoba senden nung lemtetba ama teinyaktsü mapatem inyaka agizūka liasü.

Iba senden nung Jehovah Jereh School, Vidima recognition atema agizüksü jemi, Highland Hall Higher Secondary School, Naga United Village atema Grant-in-Aid ya DEO ajanga report agütsüba sülen taruba senden nung jembitsü lemtet.

Serendip Guardians, 7th Mile Model Village society registration taruba DPDB senden nung jembitsü lemtet. Nodal officer for Disaster Management, Chumoukedima ajanga tzüngsang-mopung indang osang agütsü, PWD (R&B), Health & Family Welfare aser PHE department temia parnok meyi asoshi renemshia aliba indang osang agüja liasü.

Governor La. Ganesan-i Shamator semdang



Dimapur, Monupii/May 10 (TYO): Nagaland Governor, La. Ganesan-i May 10, 2023 nü Shamator district semdanga District DB's Customary Court, Shamator nung sorkar ketdangsur aser civil society tem den senden mena liasü.

Iba senden nung Governor Ganesan-i ashiba agi, senotsü tsütsü timtemba ama tayongzükba/tetsükdaktsü balala liaka Yimkhiung aser Tikhir kin asoshi yimjung aser terenlok bener arutsütsü nükjidong nung Shamator district kumtetsü.

Pai Yimkhiung aser Tikhir kin dang tesüiba indang amadoktsü aser tai atoktsü ayongzük, kechiaser lokti renloktsü aser tejakleni aotsü atema yimjung nüngdaker, ta ashi.

Terenlok tsütsü yimtsüng, kin-kidong ajak kasa alitsüla, ta pai ashi.

Elementary education ya constitutional right lir aser tanur shinga senzūka metoktsütsüla, kechiaser Shamator district nung literacy rate ya shilem

66.25 lir, koba state nung tajemtiba lir, ta Governor-i ashi aser shisaliok shidak agütsütsü atema nūburtem dang tali meranga inyaktsü ayongzūka liasü.

Ganesan-isa sorkar ketdangsurtem dang shisaliok, tajemtsü tzü, health, lenmang tajung aser banking services ama nūbur ajangzükba tongtipang services tem tajungtiba nung agütsütsü ajungshia liasü.

Pai Civil Society Organizations aser Heads of Offices tem den sensaksem kaa liasü.

Iba senden nung District Administration, Heads of Offices aser YTC, TTC, YAA, TSU, YWO, TWA, District DBs Association, Shamator Chamber of Commerce, Shamator Town Public Forum, Shamator Students' Union, Area Gaonburas' Association nungi lenirtem dena liasü. Senden nung Deputy Commissioner, Shamator, Thuvisie Phoiji menden liasü.

Exit poll ajanga Karnataka nung Congress-i takok angutsü asadangteter



May 10, 2023 nü Bengaluru nung Karnataka assembly election agiba anogo nung tantsür ka wheelchair nung mener vote agütsü arudang army temi yariba noksa nung angur.

Bengaluru, May 10 (Agencies): Karnataka assembly election exit polls teimbakati Congress-i takok angutsü asadangteter, ajisüaka party kati danga sorkar akümtsüsa menden peria mengutet nunga (hung assembly) Janata Dal-Secular (JD-S)-i shilem tulu agitsü.

Bodhbarnü Karnataka assembly elections agiba nikongdang 6:00 ako nung tembangogo. Karnataka legislative assembly nung menden 224 lir aser sorkar akümtsü atema menden 113 angutsüla.

BJP-i maneni Karnataka nung sorkar akümtsü nükjidong nung kanga meranga nüboyimogo aser Congress-ia 2024 küm Lok Sabha election jakdang iba state nung takok angutsü nükjidong nung kanga meranga nübo yimogo.

Zee News-Matrize exit poll

ajanga, Congress-i menden 103 nungi 118 tashi angutsü, BJP-i menden 79-94 angutsü aser JD (S)-i menden 25-33 angutsü, ta asadangteter.

TV9-Polstrat exit poll ajanga, Congress-i menden 99-109 angutsü aser single-largest party asütsü, BJP-i menden 88-98 aser JD(S)-i menden 21-26 angutsü, ta asadangteter.

Republic/P-MARQ Karnataka election exit poll ajanga, Congress-i menden 94-108 angutsü aser single largest party asütsü, BJP-i menden 85-100 aser JD (S)-i menden 24-32 angutsü; aser JD(S)-i shirnok yaridi iba party jagi sorkar akümtsü, ta metetdaksü.

ABP News/C-Voter exit poll ajanga, Congress-i menden 100-112 angutsü aser single-largest party asütsü aser BJP-i menden 83-95 angutsü, ta asadangteter.

Asianet Suvarna News-Jan Ki Baat Karnataka election exit

poll ajangabo, BJP-i menden 94-117 angutsü, Congress-i menden 91-106 angutsü aser JD (S)-i menden 14-24 angutsü, ta asadangteter.

Karnataka assembly election nung tokteper candidates ajak senteper 2,615 liasü. Bodhbarnep vote agütsür mezüngpurtem rongnung Chief Minister Basavaraj Bommai, Finance minister Nirmala Sitharaman aser Infosys tenzüksang, Narayana Murthy nung densema liasü.

State nung sorkar tasenba atema vote agütsütsü temsüa alir crore 5 dak tema lir. Iba election nung tokteper tongti party asemji ruling BJP, Congress aser JDS liasü.

Bodhbar nikongdang 5:00 ako tashi nung vote agütsütsü temsüa alir shilem 65.69 dak temai vote agütsüogo. May 13 nü vote zünga election agiba osang metetdaksütsü.

Doctor kati Amongnü shia yimdak-lirtem angati treatment agitsür

Patna, May 10 (Agencies): Tanü putu nung doctor tem aikati shirangertem treatment agiba atema shirangertem dang nungi sen tali meshir, ajisüaka Bihar yimtiba, Patna nung aliba doctor katibo Amongnü shia yimdaklirtem angati temang tendangtsür aser mozü angati agütsür, ta osang ka ajanga metetdaksü.

All India Institute of Medical Sciences (AIIMS), Patna nung Dr. Raman Kishore-i angati health camp ayongzüker aser pa leniba nung team kati tang tashi nung shiranger 10,000 dak tema angati treatment agitsüba den külemi mozü angati agütsüogo. Pai aniba team nung doctor temjia AIIMS Patna nungsa inyaker.

Küm pezü tejaklen Raman-i yimdaklirtem angati temang tendangtsü tenzüka liasü aser iba mapang nungjagi tenzüka tanü tashi pai Amongnü shia yimdaklirtem angati temang tendangja mozü angati agütsür.

Pa leniba nung team kati Patna yimti telongtet kilometer

30 tashi nung health camp 89 ayongzüka katsüogo aser iba mapang nungji parnoki shiranger 10,000 dak tema repringogo.

Raman-i ashiba agi, pai nüburtem angati treatment agitsüba nung ita shia pa itasen shilem 70-80 indoker.

Raman-isa, "Ni MBBS atemba sülen internship inyakba mapang nung paralyze asür shiranger aika aru. Parnoki high blood pressure indang meteta ali asübo paralyze mesüla. Iba mapang nungjagi tenzüka ni yimtsüngtem nung iba tashidak indang awareness agütsü tenzüka. Iba atemaji ni App ka yanglua shirangertem record aser contact number bendener. Onoki mapang shia shirangertem den tongteprateper aser treatment dak sendakba tetuyuba agütsür," ta ashi.

"Doctor tem ajak Hombar nungi Honibar tashi duty mazüngi inyaker, ibayongji Amongnü anogotem nung ang onoki angati medical camps ayongzüka agir," ta paisa metetdaksü.



May 10, 2023 nü 'Mocha' ta ajaba yipru mopung tesashi süiba sülen Port Blair nung aliba Veer Savarkar International Airport nung disaster management team kati mopung agi laodaktsüba süngdong ka rangsaa agienba noksa nung angur.





Divyangjan-i inyakba teka mapa tajung balala ajangshiang

DIVYA KALA MELA-2023 SEMDANGANG

Iba ya Divyangjan 100 dak temai yanglutetba osettsüset aser products sayaba sentong tajung ka lir



State Balala Nungi Teka Mapa Ashirtem aser Teka Mapa Inyaktetertermi Yangluba Local Products Sayatsü aser Ayoktsü

Sobaliba Sentong Agitsü (Anogo Shia Nikongdang 6:00 Ako Nungi)

State Balala Nungi Chiyungtsü Tajung Aika Angutsü



“Matamabensartemi tetsükdaksü aser timtem balala koktetba ajanga asenok ajak ajungmesor. Asen Divyang aianu aser adianutem taküm libaliro nung temelenshi adokdaksütsü atema mera aika agia inyakdar.”


-Narendra Modi, Ato Kilonser

May 11 nungi May 17, 2023 tashi | Anepdang 10:00 ako nungi Aonung 10:00 ako tashi

Maniram Dewan Trade centre

National Highway 37, Bethkuchi, Adjacent to ISBT

GUWAHATI



Ajak pelashishia jaoker

SASHAKT DIVYANGJAN, SAMARTH BHARAT



ENTRY FREE





TIR YIMYIM YIMOBILEM (EDITORIAL)

DIMAPUR

YANGTEPNÜ

MONUPII 11, 2023

Tali asüngdangbolur asü?

Yimkong adenshir yimten aser lokti ken o benoka lemtettsü tasak, anungji akhi putu mapang nungi Naga kintem rongnunga asen Ao kin ya balaka putu yimsüsüba menden lateta yur, yangji pei pei kin aser kidong nungi tatar yimsüsür shimer yimsü sūdaksür. Aji oda, tanü tashi asenok yimtak yimtsüng nungbo putu menden nung shirnok yimsüsütsü agi ataa lir, item tatartem jagi nübortem madak yimsü asür. Kasa putu yimsüsüba yimyaji anüolen pi tashitemetetter limatem nungi ajizüka bener arua tanü India nung nübortem nem pei alidak pei mulungba yimsüsürtem shimdaksür. Aji oda, tanga state-tem den kasa Nagaland nunga küm pungo shia election agia yimsüsürtem shimer tatar sendeni yoker. Item tatartemji yimkongi yimkong asoshi temzüng ozüng yanglutsü temulung lemteta shimtetba yimsüsürtem lir. Anungji, parnokji tashi tulu, kechiyong parnok nem nübortem ozüng yanglua inyaksü asoshi tashi tulu agüja shimtetba purtem lir. Aji oda, nübortemi election nung shimtetter yoker yimsüsürtemi tatar senden nung kechi lemtetdir, itemji parnoksasa masü saka nübortemi agütsüba tashi ajanga lemteter. Ibaji Democracy, tetezü nübortem dak aketba tashi. Anungji, iba tashiji amshia nübortem asoshi tajung inyaksüba kanga tesadem aser jangratemtsüka lir. Ajisüaka, nübortemi tashi agüja putu ait nung temzüng ozüng lateta yimsü asütsü shimtettsü ser nung, putu ait nung temzüng ozüng latetbatem mapa küma moutet, ken o ajak yimkong senden jazüka jembir külenang mapa akümtsüsa akümer ta süra nübortemi yimsüsütsü tashi agütsüba to amajok akümer. Ibaji mesüka, tanü Nagaland nung tatar senden nung latetba temzüng ozüng mapa küma mamshitetter aser yimten telemtetba agitsü nungdak ajak nung lokti tentettem metsü semer nungi lenirtem jaoka o lemtep sentong akaba ya junger amai saka iba yagi government mali ama akümba tamaittsü sayur. Aji oda, yakanüa lokti tentet aika nungi tanishirtem jaoka Nagaland nung Municipal aser Town Council tentettsü indang jembiba den ano Nagaland nung totzü atsütsüba onük aser Nagaland nung sensosanger bentettsü asoshi inyakba mapa Register of Indigenous Inhabitants of Nagaland (RIIN) indang ken o süoka shisalemsatepbaji tangatsübo tajung saka nübortem asoshibo tia majung, kechiyong government nung alirtemi nübortemi parnok nem yimsüsütsü tashi agütsüba mamshitet nübortem dangi meyipa arur asütsü. Tebilemba tajung süaka lokti senden nungbo telemtetba tajung magitetter aser koba onük nung südirsüaka lokti nungbo ajak tebilemba kasasabo masütsü. Aji oda, tatar senden nung telemtetba agia yur, aji mamshinüba agi teka metsüdok amai nübortem dang asüngdangba ka süra, itemjibo balaka saka shitakba nübortem asoshi telemtetba ka agitsü asoshibo yimkong senden jaoka jembitsü menügdaker. Atangji, temzüng ozüng latetbajia nübortem asoshi, anungji telemtetba magidang yimjak nung nübortem dang nungi tebilemba meshia sangdongtsüabajibo tim dang lir. Ajisüaka tatar senden nung telemtetba ka agili, aji mapa küma inyaksü asoshi Naga kin ajak nungi lokti tentet lenirtem jaoka jembili ta asünungbo, Nagaland nung yimsüsüba menden ya 'Unicameral' masü saka 'Bicameral' ali amai, Legislative Assembly ka aser Legislative Council ka ta ali amai asütsü. Aji oda, Nagaland nungbo Legislative Council mali ser lir amai Legislative Assembly nung latetba aser lemtetba ajak mapa akümtsü atema ano nübortem alidak tanga sabang ka nung jembitsüsa kümra, kenü nung atemtsüba mapa küm junga nunga metemtettsü. Iba jagi RIIN maparenbo ajak 2019 nung tembanga inyaker ser nung ano lokti ken o lemtepdakisa bener arur. Kasaji totzü atsütsüba aser Urban Local Bodies tentettsüba onüktema yimkong senden nung benoka jembibet jembiba yagi tebenjaba dang akümtsü. Tatar senden nung nübortem asoshi tapet ozüng lateta mapa küma inyaksü melen, ano nübortem dangsa asüngdanga mongra, ajibo ano election khen jungjunga agishir inyaksüba mapatem dang asütsü.

OLEMSABANG

Laishiba nung aliba temeim tapu balala indang tatsü aki

Mr. Y. Imti Tzudir, Dimapur

(Yashi adok nungi...)

Amangbapurtemi iba temeim koda amshitsü:

- (i) Yohan 13:34, 35: "Ni nenok nem ozüng tasen ka agütsür, ni nenok meimba ama, yamaji nenoka kati ka den meimtepang iba jagi nenok kü nütsüngtem ta nisung ajaki metettsü"
- (ii) Galatia 5:14 "Kechiyong o ka nung ozüng ajak ataloker, iba oji ya" "Nai ne kiyonger dang pei ama meimang"
- (iii) Mathi 5:44 "Nenok tsükchirtem meimang... aser parnok asoshi sarasademjang"
- (iv) I Kor. 13:13 "Jokorla, tangbo tamang, teimla, temeim, item asem teti lir, aser item rongnung te, meim tulutiba"

Yisu Khrista Temeim:

- (i) Tsüngremji Temeim (I Yohan 4:8, 16).
 - (ii) Zütsüra agi timtemba angudang mesüra nisungtem yaseta lulaba angudang pai kanga dang aria bilem aser pai yari. (Mk. 1:41; Mt. 15:32).
 - (iii) Lazar teyi nunger Lazar sür temulung raksaa jeba angudang Yisui ajeb. (Yoh. 11:35). Yirusalem yimti raksatsüba tia angudang Yisui ajeb (Lk. 19:41)
- Yisui kechisa inyak temeim agi inyaker aser nisungbaji ajungtsü atema dang inyaker. Agape temeim Lai kar tapu aser tekong tem yamai agütsür; tazüngeritemi pei Lishiba lapoka zünga tajungba angatettsü.

- (1) Mathi 24:12
- (2) Luk 11:42
- (3) Yohan 3:16; 35; 5:42; 13:35; 15:9, 10, 13; 17:26.
- (4) Rom 5:5, 8; 8:32 - 39; 12:9; 13:10; 15:30.
- (5) I Kor 4:21; 13:1-13; 16:24.
- (6) 2 Kor. 2:4, 8; 5:14; 6:6; 8:7, 8, 24; 13:11, 14.
- (7) Galatia 5:6, 13, 22
- (8) Efesa 1:14, 15; 2:4; 3:17, 19; 4:2, 15, 16; 5:2; 6:23, 24.
- (9) Filipi 1:8, 9; 2:2.
- (10) I Tesa. 1:3; 3, 12; 5:8, 13
- (11) I Timoti 1:14; 6:11
- (12) 2 Timoti 1:7, 13
- (13) Filemon 5, 7, 9.
- (14) Ibr 6:10; 10:24
- (15) I Yohan 2:5, 3, 1, 16, 17; 4:7-10; 4:12, 16, 17, 18; 5:3.
- (16) 2 Yohan 6.
- (17) Yihuda 21;
- (18) Jungkai Adokba 2:4.

Tejen lai nunga iba temeim indang tokong kar nung yamai shia lir:

- (i) Anitet 34:6
- (ii) Isaia 63:9
- (iii) Yerimia 2:2; 31:3.

Item pezü indang aikati meteta alitsü saka tali junga angatettsü aser shitak amshitsü teimla nung ni iba temeim indang rateta zülur. Lai tokongtemji zünga taliu tajungba angatettsü. Asenok meimchirtemi inyaksü atema temeim pezüprongji nungdak aser aikati aji inyaker. Saka tongtibangtaji Tsüngrem temeimji lir koba dang 'Agape' ta ajar. asenok

Khristantemi Agape temeim ya inyaktettsü Tsüngrem dang meshitsüla kechiaser iba Tsüngrem temeim ya inyaktet nung dang temeim tanga asemjia aibelen mesüi inyak t e t t s ü . Tongtibangsa asenok libaliro nunga junga azüoktettsü atema Pileo temeim ya kanga tongtibang. Aser kibong kar nung tsürabur o chirnur na meyimteptsü atema Stergo temeim ya kanga nungdak. Saka asenok kija aser kibongtem ajaki Agape temeim ya amshitsü kanga tongtibang; saka Khrista asen dak maka tashi iba temeim ochiba nung amshitettsü aser inyaktettsü makok. Aser iba temeim asen dak ali nung dang tanga temeim asemjia shitak amshitsü akoktsü. Iba ocet den külemi "Tsüngrem Temeim" ta sür ken ka tonic solfa nung agütsür. Tazünger ajak Tsüngremi moajangma.

TSÜNGREM TEMEIM (God's Love - Agape).
(I Korint 13 nungi agizüka mejemba ken) By: Y. Imti Tzudir.

Key of F. 4/4.

is | s | - | l | s | : m | d' : d' | d' | : - | t | l | s | : f | f | s | - | f | f | m | - | l |
: m | m | - | f | m | : d | m | : m | s | : - | f | f | m | - | r | r | m | - | r | r | d | - | l |

1. Ni | ni - | sung | o | a - | ser | ko - | tak | ten - | yar | O | a - | gi | jem - | bi - | a - | ga,
2. Te - | me - | im - | i | ta - | langka | a - | rem - | zü - | ker, | A - | ser | tao - | chi - | sa - | yur,
3. Te - | me - | im - | i | ta - | majung | nung | me - | pe - | lar, | O - | chi | nung | dang - | pe - | lar;
: d' | d' : - | d' | d' : s | s | : l | l | : - | t | d' : d' | l | l | : t | - | l | l | s | : - | l |
: d | d | - | d | d | : d | r | m | f | - | f | f | : d | - | s | s | s | - | s | : d | d | - | l |

is | s | - | l | s | : m | d' : d' : d' | r' | l | - | t | t | - | l | s | : s | t | . t | d' | - | l |
: m | m | - | f | m | : d | m | : s | f | f | : f | f | - | s | f | m | l | l | s | : f | f | m | f | s | - | l |

Sa - | ka | kü | dak | te - | me - | im | me - | li - | ra | | Ni | ta - | ku - | shi - | ba | yin | a - | küm,
Te - | me - | im - | i | te - | nük | meme - | re - | mer, | A - | ser | me - | zü - | me - | küm | ma - | sür,
A - | jak | ben - | te - | ter, | a - | jak | a - | manger, | A - | jak | im - | lar, | a - | rem - | zü - | ker.
: d' | d' : - | d' | d' : s | s | : t | l | l | : r' : r' | - | r' | r' | l | t | d' | d' | - | l |
: s | d | - | d | d | : d | r | m | f | f | - | f | s | - | s | s | s | s | s | d | - | l |

: d' | r' | - | r' | r' | r' | d' : r' : m' : - | d' | l | s | - | d' | d' | r' | - | r' | r' | r' | r' | d' | d' | r' : m' : - | l |
: m | f | - | f | f | : f | m | : f | s | : - | m | f | m | : m | m | f | - | f | f | : f | f | m | : m | m | f | s | - | l |

Ni | sa - | yu - | tsüng - | i - | tsü | sempet | li - | a - | ka, | Te - | me - | tet | ba | a - | jak | ni | me - | te - | ta - | ka;
Ain | ma - | doker | a - | ser | ma - | jung | ma - | sü - | ker, | Te - | me - | im - | i | ta - | ma - | jung | nung | me - | pe - | lar.
Tangbo | ni | te - | sa - | dang | ka | dang | me - | te - | ter, | Sa - | ka | ta - | tem | nung | ni | junga | me - | tet - | tsü.
: d' | t | - | t | t | : t | l | : t | d' : - | s | s | : d' | - | d' | d' | t | - | t | t | t | t | l | l | t | d | - | l |
: m | s | : - | s | s | s | s | : d | - | d | d | d | - | d | m | s | - | s | s | s | f | f | : m | s | d | - | l |

: m' . f' | s' : s' . s' | d' : r' . m' | f' : f' . f' | l | - | t | l | s | : f' . f' | m' : r' . r' | d' | - | l |
: m | f | s | s | s | : m | m | f | : f | f | l | - | s | f | m | l | l | s | : f | f | m | f | s | - | l |

Te - | nem | a - | jungdok - | tsü - | sa | ta - | mang | li - | a - | ka, | Te - | me - | im | me - | li - | ra | a - | ma - | jok.
A - | jak | a - | zü - | zü - | ker, | a - | jak | a - | rem - | zü - | ker, | Te - | me - | im | ko - | danga | ma - | jen - | tsü.
Tamang, | te - | im - | la, | te - | me - | im | te - | ti | a - | lir, | Sa - | ka | te - | me - | im | tu - | lu - | ti - | ba.
: d' . r' | m' : m' . m' | d' : t | d' | r' : r' . r' | t | - | t | t | d' | r' . r' | d' : t | t | s | - | l |
: d | d | d | d | d | d | d | r | : m | m | f | - | f | f | s | s | s | s | s | s | d | - | l |

LEPLAZÜ.

: m' . f' | s' : s' . s' | s' : m' . r' | m' . d' : d' | d' : d' . r' | m' : m' . m' | s' : f' . m' | m' : r' | - | l |
: m | m | s | s | s | : m | m | f | : m | r | m | m | s | s | s | m | m | m | f | - | l |

A - | sen - | i | pei | rongsen | a - | jak | a - | gü - | ja - | ka, | Teme - | im | me - | li - | ra | a - | ma - | jok | dang;
: s | s | d' : d' . d' | d' : s | f | s | m | f | m | f | s | s | s | t | t | l | s | - | l |
: s | s | d | d | d | d | d | d | r | m | f | f | d | d | d | m | m | r | d | s | - | l |

: m' . r' | d' : d' : d' | d' : d' . t | f | l | - | t | l | s | : d' . d' | t | d' | r' | - | l |
: s | f | m | m | m | m | s | f | f | f | l | - | s | f | m | l | l | s | : f | f | m | - | l |

A - | ser | pei | mang | rongdaksü - | tsü | a - | so - | shi, | Bendang - | a | a - | gü - | ja - | a - | ka,
: d' . t | s | s | s | s | s | s | d' : t | d' | - | d' . d' | d' : r' . r' | d' : d' | t | t | s | - | l |
: m | s | d | d | d | d | d | d | m | f | f | f | - | f | f | d | m | m | r | d | s | - | l |

: m' . f' | s' : d' . r' | m' : s | s | l | l | t | d' | - | t | l | s | : f' | f' . m' : r' . r' | d' | - | l |
: s | s | d' : m | f | s | : f | m | f | f | l | - | s | f | m | l | l | s | : f | f | m | - | l |

Sa - | ka | Tsüngrem | Teme - | im - | ji | me - | li - | ra - | bang, | Ko - | danga | ta - | jangzük | ma - | li - | tsü.
: d' . l | s | s | s | s | s | s | d' : t | t | d' | - | d' | d' . d' | t | t | t | s | s | s | - | l |
: m | r | d | d | d | d | d | d | f | f | f | f | - | f | f | s | s | s | s | s | s | d | - | l |

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

IMB-i Vietnam nung missionary Rachel nem tetushi agütsütsü



Missionary Rachel Kerr James aser la kinüngbu Sam James na noksa nung angur.

May 10, 2023: International Mission Board (IMB)-i, Vietnam linük nung rara aliba mapang küm aika talangka missionary inyaker nurse, Rachel Kerr James nem tetushi agütsüba sentong ka tan hopta ayongzüka agütsü, ta metetdaksü.

Rachael James bilemteta la nem tetushi agütsüba sentongji May 13, 2023 nü First Baptist Church (Richmond, Virginia) nung agütsü.

Vietnam linük nung Southern Baptists tenzüker mezünpurtem rongnung Rachel James aser la kinüngbu na densema lir. Lar kibongi medical clinic aika lapok aser lai la kinüngbu yarisema Arogo tasen aika tenzüka liasü.

Rachael James-isa East Asia, Northern Africa aser Middle East linüktem nunga Tsüngrem tenzüka aruogo. La taküm April 18 nü arrshi küm

88 lia asü.

La 1934 küm October 17 nü Durham, North Carolina nung aso aser Duke University nungi Bachelor of Science degree ngua liasü.

La tanur asüdangyongji missionary akümtsü nükjidong liasü. Lai mission mapa inyaksü kanga janra aser tesüsabo lai Tsüngrem tenzüksü tajaba tejangja meteta liasü.

1957 küm la Sam James den kibong aküm aser 1962 küm lar kibong Vietnam nung missionary inyaksü atema Foreign Mission Board (tangbo International Mission Board)-i shima liasü.

Vietnam war mapang lai South Vietnam nung küm 14 tashi Khrista osangtajung prokba den külemi nurse ama nüburtem tenzüka aru. Talisa lai Saigon (tangbo Ho Chi Minh City ta ajar) yimti anasa yimtsüngtem nung shirangertem

tenzüka aru.

1975 küm April ita nung North Vietnam sepaitem Saigon tsütsülen tonga aruba mapang Rachel James den lar tanur pezübo Thailand-i khen aienshidakja atadaksü.

Vietnam nung küm 14 tashi tenzüka sülen Rachel James-i maneni küm 38 tashi alima tesem balala nung nüburtem tenzüka liasü. Ano külen la kinüngbu Sam-i linük 115 tashi nung IMB-i ayongzüka training agüja aruogo.

Vietnam sorkari küm shia linük aiben semdangtsü atema 2002 küm tena nem temelaba agütsü. 2009 küm Vietnam sorkari Sam ya "professor of religion" ta agizük aser Vietnamese Baptist Bible Institute nung tesayur inyaksü temelaba agütsü.

2013 küm December 31 nü tenati IMB nungi anisüngzüka liasü.

Khristantemi Supreme Court nem takhangba tasen ka agütsür

May 10, 2023: India nung Khristan teloktemi, yimsü nung ajemdaker ozüng alema inyakba tatalokbatem ya Hindu pusemba ruling party den sendaktepa lir, ta shia Khristantem anema inyakba tatalokbatem bushisüngdangtsü atema jurila agency ka nem agütsütsü akhanger.

May 08, 2023 nü Supreme Court nung temepishiba ken o ka angadanga mapang nung BJP-i aniba Centre sorkari Khristantem anema inyakba tatalokbatem nung tai tonglokja aliba Hindu telok kar sendaktepa aliba metetdaksüba sülen Khristan teloktemi item ama tatalokba bushisüngdangtsü atema jurila agency ka nem agütsütsüla, ta takhangba agütsü.

Sorkari Khristantem anema inyakba tatalokba nung shilem agia alirtemji Vishwa Hindu Parishad (World Hindu Council) aser Bajrang Dal (brigade of Lord Hanuman)

teloktem lir, ta ashi, ajisüaka linük nung Khristantem reshikangshiba mali, ta metetdakja liasü.

2021 küm Bangalore nung tongti putir Peter Machado, National Solidarity Forum aser Evangelical Fellowship of India senteper Supreme Court dang linük nung Khristantem anema inyakba tatalokbatem nokdangtsü atema tutuyuba agütsütsüla, ta temepishiba ken o benoka liasü. Parnokisa, 2014 küm BJP sorkar aruba mapang nungi tenzüka linük nung Khristantem anema inyakba kanga bulua kümogo, ta metetdaksü.

"Centre sorkari, yimsü nung ajemdaker ozüng alema inyakba nung yimtenren teloktem sendaktepa lir ta parnok sasa nangzüko, anungji itemji mita repringtsü mesüra reoprt renemba maparen nung Centre sorkar dak imlatsü mesüra temlung alemtsü makok," ta temepishiba

ken o benokertemi Supreme Court dang ashi.

Bushisüngdanga agency ji Supreme Court nung anisüngzüker aliba judge ka asütsüla aser züngsemtem rongnung police ketdangsertem züngoktsüla, ta parnokisa ashi.

Vishwa Hindu Parishad, Bajrang Dal aser ruling BJP-i Hindutva ajungkettsür aser India ya Hindu linük akümtsü tangatetba nung inyaker, ta parnoki ashi.

Uttar Pradesh, Madhya Pradesh aser Karnataka ama BJP-i yimsüsüba kanga tongtibang state tem nung anti-conversion ozüngtem benoka lir aser Hindu pusemba teloktemi iba ozüng nungi maongka agia Khristantem anema inyaker, ta parnoki ashi.

Supreme Court Chief Justice, D Y Chandrachud leniba nung judge aseme akümba bench-i Khristantem takhangba atema tang tashi telangzüba magütsü.

ANOGO ABEN TSÜNGREM DEN

Pa ozüng nung (T.ken 103:19-22)

Tanü na timtem nung liaka, teimla maka osang angashiyonga kecha masü, ibaji mataloktsü akok! "Kibubai pa menden anüngtem nung yanglua lir; aser Pa yimli ajak madak chubatsü" (t.19).

Tsüngrem Kotak chuba menden nung lir aser tatalokba ajak Pai azüoker. Ken ken yamaji meinyaker ama asütsü akok. Nai tanguba agi jajara idakji Tsüngrem aliba memetetsü. Mesüra idakji Tsüngrem lira Pai anebalur asü? Mesüra, Pai anebalura, Pai ajak inyaksü akok asü? Ken züluri asenok dang ashir, "Tanguba agi tejaja; tamang agi jajaang."

Tsüngrem temeranger telok ka kar. "Kibuba moajang, nenok Pa kotak tenyartem: Pa ola nung tenarong tenang, Pa ola angang, nenok tashi tulu rogo" (t.20). Tenyartemi Pa ozüng nung inyaker. Asenoki Pa o züngra aser Tsüngrem O beshira aser tashi angara, alima nung mapa ajak asenok den inyaksü. Asenoki Tsüngrem O nung tashi mangara, ajaki asenok anema inyaksü -Yona dang inyakba ama, shibai Tsüngremi tuyuba toktsür rong tai nung mener, nükjidong tamajung nung ao. Tatem nung Tsüngremi tashi angaba lemangi pa anir aru.

Yona ama teli. Tsüngremi ajak azüoker aser tia ajak nung ne dak mapa inyaker ta amangang.

Ne anogo mejungaka mesüra teimla makaba osang angashiaka kecha masü, Tsüngrem chuba menden nung lir ta amangang. Pai yimsü asür aser Pa tenzükertemi Pa o ataloktsür. Tanü Tsüngrem O nung amangang aser tamang agi jajaang.

Madhya Pradesh nung orphanage ka mita aodang putir ana apu

May 10, 2023: Madhya Pradesh state nung sorkar ketdangsertemi Arogoi lapokba orphanage ka mita aoba mapang putir ana apu; putir ana jagi parnok timtem agütsü, ta tai tonglokja apu.

May 8, 2023 nü state child rights panel nungi ketdangsertemi Shyampur nung aliba St. Francis Sevadham Orphanage mita aoba mapang nung putir ana E. P. Joshy aser Naveen B nati tetsükdaksü agütsü, ta tai tonglokja apu, ajisüaka kasa anogo nungjisa bail nung chiok.

Osangbener den jembidang Joshy-i, "Inspection team jagi temeshi sabangi tunüa liasü, saka onoki ibaji ashishiba ajanga onoki tetsükdaksü agütsü, ta küna nem tai tongloktsü," ta ashi.

National Commission for Protection of Child Rights nung chairperson, Priyank Kanoongo leniba nung team kati orphanage mita repringtsü, ta osang metetdaksüba sülen putir Joshi orphanage jagi oa liasü.

"Ajisüaka team jagi orphanage dang masü saka Tenla ki, convent, presbytery aser tanurtem indang hostel tem-a mita repring," ta pai ashi.

"Putir Naveen künnati parnok dang Tenla ki sabang ajak temeshi anungji sabangi matutsüla, ta ashi, ajisüaka parnoki sabangi tua temeshi

osettem mita repring," ta pai ashi.

Idangyongjisa parnok police aja aser nisung ajak lia küna dak azük, ta pai ashi.

Tsürabur kati tashishiba ken o agütsü, ta shia inspection team jagi orphanage nungi tanur ka anir ao, ajisüaka parnoki tsüraburtemi ashishiba kuli kaket kecha magütsütet, ta orphanage director, putir Sinto Varghese-i ashi.

Orphanage ketdangsertemi ashiba agi, ketdangsertem team jagi computers, CCTVs, mobile phones aser tongtibang documents kar raksatsü aser iba orphanage nungji ozüng alema tanurtem Khristan yimsü dangi meyipdaksür, ta tai tonglokja liasü.

May 9 nü osangbener den jembidang Varghese-i, "Parnoki orphanage nungi oset kar den documents kar bener aoba sülen, onoki orphanage nung tanurtem yimsü meyipdaksür, ta onok nem tai tongloktsü," ta ashi.

Yaküm January ita nunga District Child Welfare Committee-i, kaketshir 44 nem kangshia nashi shi chidaktsü aser kangshia Khristan yimsü dangi meyipdaksü, ta tai tonglokja liasü. Ajisüaka state court-i ibaji Khristantem nem tiyazü nung tai tongloktsüba lir, ta obendang agüja liasü.

AO OSHI ANGAZÜKDAK:
TANÜ ANGAZÜKTSÜBA OJANG



Puok

(v) pua ayu, shibanga ayu (imprison, lockup, cage)
* Auersang tepuokdak puoka yur par ak ka puok.

Puok

(n) yimkong külemi achitsüba alumang (an area for common cultivation in a particular year)
* Azünglen puok shimtetba kümbo kanga belemer.

OLONG PAITEP # 6511

Grid for Olong Paitep # 6511 with numbers 1-16 indicating starting points for words.

TIPIEN

- 1. Ibai masü - (5)
- 6. Ajak dak atongba tashitak - (4)
- 7. Tar kanga tatsü - (6)
- 9. Jala kinungpu - (4)
- 10. Ayoktsüba atakteta ayuba - (7)
- 11. Kilitsü atema alizüka ayuba - (4)
- 14. Ango takong - (6)
- 15. Ta _ _ _ _ h - (4)
- 16. Ajok - (5)

LANGTSÜNGLEN

- 2. Ashiba inyak - (4)
- 3. Milen agi sangwadaktsü - (6)
- 4. Ongken - (5)
- 5. Arem an - (4)
- 8. Nisung tasen - (5)
- 9. Toktepba apuso - (5)
- 10. Alemlü sen - (6)
- 11. Tzü mali aküm - (5)
- 12. Telung nung ayu - (4)
- 13. Khu nung nailokba lisu - (4)

OLONG PAITEP # 6510 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :


- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



Tetsür dang nungibo teburtemi taliba moker.

Noksa nung meputepi aliba 10 bushiang



Indian Navy-i Assam State Zoo nung black panther ka adopt asü



Guwahati, May 10, 2023

(Agencies): Indian Navy indang Black Panthers ta ajaba INAS 303 naval squadron tentetba sülen küm 10 ajungba tenüng nung Bodbarnü Commander Anil Kumar-i Assam State Zoo cum Botanical Garden nung black panther ka adopt süogo.

Indian Navy ajanga adopt asüba black panther ya küm ana

tain lir aser 'Raja' ta tenüng jalokja lir.

"Commander Anil Kumar-i zoo semdang aser zoo ketdangsürtem nem adoption sen agütsü. Black Panther navy unit tenteter küm 10 ajungba dang masü saka Black Panther species nem tetushi agütsüsü aser India nung wildlife conversation ajungkettsü atema black panther adopt asü" ta Indian Navy

ketdangsür kati ashi.

Black Panther squadron indang emblem ya black panther lir ta Indian Navy-isa ashi.

"Assam State Zoo ketdangsürtemi INAS 303 squadron ajanga Raja adopt asütsü pusema nungiter. Iba ajanga parnoki lipoküm aser shirurudem wazüka ayutsü bendanga agütsüba sayur" ta ketdangsürisa ashi.

Itanagar nung APSC ken o atema ghonda 72 mokdang

Itanagar, May 10, 2023

(Agencies): Bodbarnü Arunachal Pradesh yimtiba Itanagar nung ghonda 72 mokdangba sentong agiogo.

State public service commission indang paper temai adokba ken o anema nisung aser telok kari iba sentong ayongzüka agi.

Tanü bank aser shisaliok rejutem densema shishilembadak ajak shibang aser sorkar office tem nunga nisung kangabo maru.

Bodbarnep 5:00 ako nungi mokdang tenzüik aser tiptema dang agiogo, ta Capital Superintendent of Police (SP) Rohit Rajbir Singh-i ashi.

Arunachal Pradesh Unlawful Activities (Prevention) Act 2014 kübok nisung 17 tashi police-i

apu, ta SP Singh-i ashi.

"Mokdangdang ozüing alema inyakertem nem tapet temerenshi agütsüsü" ta paisa ashi.

Nübertem aser kiojentem kümzüka ayutsü atema district administration-i Section 144 CrPc kübok tenokdangba agüja liasü, ta Singh-isa metetdaktüsü.

Mongulbar aonung nungi Itanagar nung internet services shibangogo.

Mokdang ayongzüker nisung kar apuba anema Mongulbarnü nisung telok kati Naharlagun police station indang gate raksaja liasü.

Capital district administration-i iba mokdang ya ozüingi memelar ta shiogo aser wine shops ajak shibangba den nisung asem tema madenshitsü

tetuyuba agütsü.

Iba mokdang ya tanüngba district 7 nung ayongzüik saka East Kameng o West Siang district tem nung dang mapa küma inyak ta sorkar ketdangsürtemi ashi.

Arunachal Pradesh Public Service Commission (APPSC) indang paper temai adokba anema state nung meptmesü tulu adoka liasü aser nisungtemi lungkak ait. Iba ken o ya CBI-i bushisüngdang asür aser nisung 50 den teimba puogo.

Tang tashi nung sorkar ketdangsür 41 dena nisung 54 pua lir. Sorkar ketdangsür 41 nungi nisung 19 mapa nungi anentsüogo aser regular employees 22 anema disciplinary actions tenzükogo.

Sohiong by-election nung voters 90% temai shilem agi

Shillong, May 10, 2023

(Agencies): Meghalaya kübok East Khasi Hills district nung Bodbarnü by-election agidang voters 91.56% temai shilem agiogo, ta Chief Electoral Officer F R Kharkongor-i ashi.

Tanü Sohiong by-election agi aser nikongdang 5:00 ako tashi nung vote enoktsür 91.56% liasü, ta pai ashi.

Tanü law-and-order ken o kecha maliasü saka polling station kar nung electronic voting

machines (EVMs) dak sendakba timtem kar ajuru aser temji yanglushi ta CEO Kharkongor-i ashi.

Tanü mezüngbuba voter pungu nem mementoes agütsü aser tang mezüng atema vote enoktsürtem nem sempet agütsü, ta paisa shisem.

February 27 Assembly election matongdang UDP candidate HDR Lyngdoh ajungbena asüba ajanga by-election agitsüsa aküm.

By-election nung UDP nungi Synshar Lyngdoh Thabab, National People's Party (NPP) nungi Samlin Malngiang, Congress nungi S Osborne Kharjana, HSPDP nungi Sandondor Ryntathieng, BJP nungi Sereph E Kharbuki aser Trinamool Congress (TMC) nungi Stodingstar Thabab nungertem tokteper.

Sohiong by-election indang votes ya May 13, 2023 nü azüngtsü.



Tibet Youth Congress züngsemtemi Guwahati nung lungkak aitba angur. Tibet Youth Congress-i Tibet nüjiso meshia "Tibet Matters March" ta ser Gangtok nungi Guwahati tashi jajayonga aru.

Ukraine nung France nunger osangbener ka tepset

Kyiv, Monupii/May 10 (Agencies): France nunger arishi küm 32 tain osangbener ka Ukraine anüdoklen raradak osang abenba mapang tepset.

AFP news agency nung inyaksang Arman Soldin ya Bakhmut anüolen Chasiv Yar anasa rocket ka khaloktsüba agi kongshia Mongulbarnü asü.

Osangbener telok ka Ukraine nunger sepa telok ka den lia nikongdang 4:30 ako meta amak.

Soldin-i tongpang nung yakbang sür mapa inyakba atema France Tir Emmanuel Macron-i tenüngsang agüja liasü.

"Par kinunger-adianu aser külemi inyaktertem den külemi temolung shiranger," ta pai tweet ka nung ashi.

AFP indang chairman Fabrice Fries-i ashiba agi, Soldin asüba agi news agency aoksa aser ibai Ukraine nung raraba osang anogoshi

osangbener temi abendang lendong ajuruba temaitsü lir. AFP news agency, Europe director Christine Buhagiar-i ashiba agi, Soldin ya mapa inyaksü jangra aliba, tashi tait aser tasü tait nisung ka liasü aser pa mapa nung bendanga agütsüba takum ka liasü.

France indang National Assembly nung political telok balala nungi MP temi Soldin nem akum agüja liasü.

Russia-i taoba küm February ita Ukraine amak tenzükdang APF team mezüngbuba aodang pa dena liasü aser yangji September ita nungi alir.

Ukraine indang defence ministry ajanga Soldin'er kinunger aser külem tenzükertertem den asükhulemsatop aser "Alima nem ochi osang agütsüba nung pa taküm bendanga agütsü. Pai inyakba aser pa mapa teti alitsü," ta ashi.

Soldin asüba osang angashia jashir ta Moscow-i ashi. "Iba osangbener asüba tensa asenoki angatettsü nüngdaker," ta Kremlin odongtar Dmitry Peskov-i osangbener dang ashi.

White House-ia Soldin nem akum agütsü aser Russia-i amakba nung ajangshiba indang alima dang sayudang asüba osangbener dang alima sentsüh lir, ta ashi.

Soldin ya Bosnia nung aso aser pa ya 2022 küm February ita nungi tenzüka Ukraine nung raraba osang abendang tepsetba osangbener 15 buba alitsü, ta Committee to Protect Journalists ajanga ashi.

Iba rara indang osang abendang ano France nunger osangbener Zakrzewski aser Frederic Leclerc-Imhoff takum samaogo.

Ukraine anüdoklen Bakhmut ya tiyong sür ita ishika kanga sashia rara arur.

Senegal: High school ka meshia longkak aitba mapang nisung 1 asü aser 30 yiru

Dakar, Monupii/May 10 (Agencies): Senegal yimtiba Dakar kübok Ngor tesem nung longkak aitba mapang mangatetep adokba sülen nisung ka asü aser lanur longkak aiter 30 yiruogo. Sorkari tashiyim tali amshiba anema lanurtemi longkak aita arudar.

Police station ka melena high school ka yanglutsü atema Mongolbar aonung kaketshirtemi longkak aitba mapang police temi parnok tashiyim agi azioka liasü.

"Sorkari onoki ashiba mangar, tir-i onoki ashiba mangar, shingaia onok nem teyari magütsüner anungji onoki onoki akokba yari onok tebilemba lemsateper," ta longkak aiter kati Al Jazeera dang ashi.

Ngor tesem tanga nüburtem aser osangbenertem maitdaksütsü atema checkpoint tem amenoktsüba den security ketdangsurtem yokogo.

"Nüburtem kümzüka ayutsü asoshi temzüng ozüng benoktsü nüngdaker. Nüburtemi longkak aittsü kecha tenokdangba mali ajisiuka longkak aitba

sentongtem ajanga nüburtem mapa aser school-i aotsü nungi menokdangtsüla," ta sorkar otongdar Abdou Karim Fofan-i ashi.

Ajisiuka Ngor nung alirtemi ashiba agi, police temi parnok mejanga aliba mapang ki kakpoka aiter aser nisung aika pua züka merenshiogo, ta Al Jazeera osangbener Haque-i ashi.

"Iba ya yimden yimsüsüba anema longkak aiterba masü aser onoki tang kechi ataloker aji mangateter. Onoki aginüba ajak agi police station masü high school ka aginer," ta Ngor deputy mayor Souley Mbengue-i ashi.

Senegal nung opposition lenir Ousmane Sonko-i pa pusemertem dang civil disobedience movement ka atema ayongükba sülen ghonda ishika lir iba longkak aitba sentong ya ayongzüka liasü. Court-i obendang agütsüba ajanga pa taruba tir election nung tokteptsü asoshi tetsükdaksü adokba sülen pai civil disobedience movement ka atema ayongzüka liasü.

Imran Khan court nung nokdak; nisung noklang aika apu

Islamabad, Monupii/May 10 (Agencies): Al-Qadir Trust ken o dak sendakba nung accountability court kati Pakistan indang taoba ato kilonser Imran Khan anogo ti National Accountability Bureau (NAB) kabu nung ayutsü Bodhbarnü mela liasü.

Kasa anogo Toshakhana ken o nung session court kati pa anema ken o benoka lir.

Judge Mohammad Bashir lenisüba kübok Al-Qadir Trust ken o jembidang National Accountability Bureau ajanga Imran Khan anogo 14 par ket nung ayutsü asüngdanga liasü.

Ajisiuka Pakistan Tehreek-e-Insaf (PTI) tekolakba indang okatsür Khawaja Harris-i aji memolung aser iba ken o ya bureau küboki maiter ta ashi.

NAB ajanga inquiry report magütsü, ta pai ashi.

Harris-i ken o open court nung jembitsüla aser ken o timi jembitsü ajak temeden lir, ta Harris-i ashi.

Paisa Al-Qadir Trust meyong ali nung ki ka yanglua yangji nüburtem angati shisaliok angur, ta pai ashi.

NAB indang legal counsel-i court dang Imran Khan apuba mapang pa aputsü totuyuba agüja aliba sayu ta ashi. Khan indang legal team dang nüngdakba kuli kaket tem agütsütsü, ta pai ashi.

NAB prosecutor temi ashiba agi, ibai graft case ka lir aser UK National Crime Agency ajanga bushisüngdang aser sen anguba ya Pakistan sorkar nem agütsütsü liasü saka Bahria Town dangi yok.

Imran Khan-i ashiba agi, pa aputsü totuyuba agütsüba ya pa apudang sayuba masü saka



Pakistan indang taoba ato kilonser Imran Khan apuba mechi pa bukumer temi Peshawar nung longkak aita osettsüset aser ki o jen nung mi senloktsüba ajanga police temi tear gas khaloktsüba noksa nung angur.

bureau indang office-i anir aodang sayu.

Kasa mapang Toshakhana ken o ya additional and district sessions judge Humayun Dilawar-i anir jembia liasü. Toshakhana nungi pai sempet angubatem indang osang metetsümonga pai soita ayu, ta tai tonglokja lir. Bendanger tongtipang nisung temi sorkar ketdangsur nem agütsüba sempet tem Toshakhana nung ayur.

Ochimashi ken o nung Pakistan indang taoba ato kilonser Imran Khan Bodhbarnü obendanger matsüngdang nokdak aser pa apuba mechi linük tesem ajungalen longkak aiter.

Islamabad nung Mongulbarnü Khan apuba sülen nisung 1,000 jungnüa puogo, ta police temi ashir.

Police guesthouse nung security akang-akanga lir, kong pa pua lir aser ibaji courtroom

ama amshir.

Pa apuba ajanga Khan aser Pakistan nung tashi tait mitkar tsüngta yimten yimsüsüba nung tongpang tesashi ka akum.

Pa aitsüra election nung metokteptettsü. Mongulbarnü pa apuba sülen Pakistan tesem ajungalen amai yimti balala nung longkak ait tenzüker aser nisung ana süogo.

Taoba mapang cricket asaya alisang arishi küm 70 tain Khan ya ato kilonser ama inyak tenzüker küm pezü majungdang taoba küm April ita menden nungi atsüngdoka liasü.

November ita Wazirabad yimti nung campaign sentong ka nung pa dak tetsüng nung akha.

Iba atema pai itdangiter tanishir ka dak tai tongloktsü, koba mitkar temi khenyongi magizüker. Pa aputsü anogo ka lia mitkar temi Khan dang tai ojang dang tongloktsütsü shia

liasü.

Tang pa anema ochimashi ken o aika benoka lir, koba yimtenren tsütsü tenük yokba lir ta pai ashir. Mongulbarnü tashi pa okadaki arutsü memolungi aputsü merangba nungi jenbua liasü.

October ita general elections agitsü aliba nung shilem magidaksütsü mechi tang aliba Pakistan sorkari pa anema ken o ya benok, ta pa bukumer temi ashir. Khan-i election tekeraba nung agitsü asoshi linük tesem ajungalen nübuyima liasü.

"Imran Khan-i ozüng ajurutsü, pa tai melira election nung tokteptettsü. Saka ochimashi ken o nung pa aibelena aliba ngutetra, iba atema pa tia balak asütsü," ta Minister of Planning Ahsan Iqbal-i Bodhbarnü osangbener senden ka nung ashi.

Khan apuba sülen police temi par party bukumer tem

pua tesem balala mita aor.

Pua alirtem rongnung Khan'er Pakistan Tehreek-e-Insaf (PTI) party indang secretary-general Asad Umar densema lir.

Punjab province nung Mongulbar aonung longkak aitba sülen nisung 1,000 jungnüa pua lir, ta police temi ashi.

Pakistan yimtiba, Islamabad nung police guest house ka jakdang police tem müketa nokdaka aliba noksa Bodhbarnep tangokba nguogo.

Khan ya legal counsel den majurutepdaksür aser court room nung pa apuba ya ozüng agi mela aliba asü masü, aji bushitsü, ta PTI ajanga ashi.

Paramilitary force, Punjab Rangers temi pa apuba aser court telungzük nung apuba ya ozüng agi memelar, ta parnoki ashir. Saka Islamabad indang High Court ajanga Mongulbarnü pa apuba ya ozüng agi mela lir ta sangdongogo.

Linük tesem kar nung mobile internet mamshiteter. Interior ministry nungi tuyuba ama service anena lir, ta Pakistan telecommunication ketdangsur temi ashir.

School tem shibanga lir, highway kar mokdanga lir aser yimti tulu nunga lenmang nung gari kangabo mejajar.

Peshawar nung tensa kanga mejungi lir, kong nisung pezü takum samaogo. Longkak aiter temi police den raratep aser Radio Pakistan indang ki densema ki aika nung longkak aiter temi mi senlokja liasü.

Tensa azioktsü mechi Punjab, Khyber Pakhtunkhwa aser Balochistan provinces tem nung army yoka lir.

Season tembangba sülen Busquets-i Barcelona toktsütsü



Sergio Busquets

Monupii/May 10, 2023

(Agencies): Sergio Busquets-i June ita contract tembangba sülen Barcelona toktsütsü, ta midfielder yagi Bodhbarnü metetdaksüogo.

"Barcelona nung iba ya ni atema tatemangbuba season asütsü," ta Busquets-i Instagram ajanga metetdaksü.

"Club nung mamatoktetsüsa asayaogo," ta paisa ashi.

Barcelona nungi asayaba mapang Busquets-i Champions League asem aser iba season masüdag La Liga tiben

kokogo.

2008 küm Pep Guardiola coach asüba mapang first team nungi asaya tenzükba sülen arishi küm 34 tain asayar ya Barca atema kanga tongtibang asayar ka aküm aser tang tashi nung pai asaya 700 dak tema nung asayaogo.

Pa koba club nungi asayatsü iba indang osang kecha melemsatep saka osang balala ajanga ashiba agi pa Saudi Arabia nung team ka nung oa asayatsü.

"Barca nungi asayatsü ya

pungmang ka aser tetushi tulu lir. Club nungi küm aika asayatetba atema kanga pelar, saka mapa ajak tetenzük ka aser tatemang ka lir," ta pai ashi.

"Telemtetba agitsü temela masü asü saka mapang tongogo ta bilemer."

Barcelona coach Xavi Hernandez, shiba Busquets den külemi küm aika asaya liasü pai pa taruba season asayadaksünüa liasü saka telemtetba ya pai agitsü ta shiogo.

Busquets ya Barcelona den tenangzüktepba yanglur aliba tembangba sülen United States nung Major League Soccer nung oa asayatsü ta imla liasü aser team tem rongnung Inter Miami indang jembiogo.

Ajisüaka tawa asayar ya Saudi Arabian top flight nung oa asayatsü akok ta Spain nung media sangdong balala ajanga metetdaksüogo.

Maneni Busquets-i Spain team nungi asayaba mapang 2010 küm World Cup aser 2012 küm European Championship kokogo. Pa küm 15 tashi national team nung tongtibang asayar ka liasü aser pa December ita international asaya nungi anenogo.

Chelsea-i asayar ana den Joao Felix melenteptsü asadangdar



Joao Felix

Monupii/May 10, 2023

(Agencies): Joao Felix loan mapang tembangba sülena Stamford Bridge nungi maneni asayadaksütsü asoshi Atletico Madrid den asayar kar melenteptsü asoshi Chelsea-i mulunga lir.

Arishi küm 23 tain Portubal nung international asayar ya Atletico den tenangzüktepba tasen ka yanglur liaka January transfer window nung loan nung Chelsea nung arua aden. London nung amendaker aliba club yagi pa den mepilaner aser teti asoshi tenangzüktepba ka yangluner, ta Evening Standard sangdong ka ajanga metetdaksü.

Felix atema Atletico puri pound million 88 meshir.

Chelsea puri forward asayar ya club toktsür modaktsüner, ajisüaka pa atema sen paikaji

intoktsü atema renema mali.

Kasa mapang nung Atletico-i, pound million 16 alang loan deal ka Chelsea nem agütsüogo.

Atletico puri Marc Cucurella aser Pierre-Emerick Aubameyang na den tenangzüktepba yanglutsü atema tejangraba aliba angazükba sülen Chelsea puri asayar ana ya Atletico den melenteptsü asoshi asadangdar. Iba deal ajanga Felix atema meshiba sen tajemba kümdaktsütsü imlar.

Maneni Felix-ia Stamford Bridge toktsür aotsü tebilemba aliba kecha merprangteter.

Pa club nung kanga jangradema asayadar.

Chelsea puri goal 3-1 agi Bournemouth akokba asaya nung goal idaktsüba sülen külem asayartem den

pelatepba mapang pai pa indang Chelsea jersey sayua liasü.

League nung Chelsea pur junga masayateti arudar, ajisüaka pai junga dang asaya arudar. Chelsea pur tang table nung bottom half nung lir.

Asaya 13 nung goal asem idaktsüba sülen Chelsea kiburtemi Felix kanga sakloka kümogo aser pa den tenangzüktepba yanglushitsü atema lenmang bushidar.

Kasa mapang nung Chelsea pur tang manager tasen ka bushiba mapang lir.

Osang ajanga ashiba agi, taoba PSG aser Tottenham Hotspur coach Mauricio Pochettino-i iba mapa ya agizüktsü akok.

Arishi küm 51 tain Argentina nung coach ya club nung adenba sülen asayar anidenba dak sendakba nung pai tongtibang shilem agitsü. Anungji Felix tarutsü ya manager tasen shimba sülenang telemtetba agitsü.

Pochettino shimra pai Chelsea team yanglushitsü. Christian Pulisic, Mateo Kovacic, Ruben Loftus-Cheek, Edouard Mendy, Hakim Ziyech, Conor Gallagher, Kalidou Koulibaly aser Mason Mount nung ajak ayoktsü akok.

Chelsea-i taruba manager meshim tashi item asayartem tia mejangjai alitsü.

Cricket World Cup atema South Africa qualify süogo

Nnew Delhi, Monupii/May 10 (Agencies): Ireland aser Bangladesh na County Ground, Chelmsford nung mezüngbuba one-day international (ODI) asaya tzünglu aruba ajanga masayatetsüsa akümiba sülen taküm India nung asayatsü aliba ICC Cricket World Cup (50 overs) atema South Africa qualify süogo.

Ireland pur points table nung jenjang 11bubai atutsü atema English county Essex headquarters nung Bangladesh den asayatsü aliba asaya asemprongla akoktsü nungdaka liasü.

Tang Ireland puri iba asayamung 2-0 agi akokyonga parnoki World Cup Super League standings nung South Africa adena metutettsü, shirnok tibuba nung lir.

Tzünglu arua asaya masayatetsüsa akümiba sülen Ireland pur June 18 nungi July 9 nü tashi Zimbabwe nung asayatsü aliba qualifying asayamung nung shilem agitsüsa akümtsü.

Iba asayamung nung West Indies aser Sri Lanka nata main event atema team ana nungdaka aliba rongnung densematsü asoshi asayatsü.

Team 10 asayatsü aliba World Cup atema WCSL nung top eight nung tembangba team nem mezüngbuba jenjang agütsür, koba taoba küm asem tsüngda asaya aruogo.

Reigning champions England, India, New Zealand, Australia, Bangladesh, Pakistan aser Afghanistan nungnerbo iba asayamung nung asayatsü jangjaogo aser tang South Africa team-a jangjaogo.

WBC: Deepak, Hussamundin aser Nishant nung semifinal-i iogo



2023 Men's Boxing World Championships sayaba mapang Deepak Bhorla asayaba noksa angur.

Monupii/May 10, 2023

(Agencies): Tashkent, Uzbekistan nung tang asaya aliba world boxing championships nung Bodhbarnü India nung asayar Deepak Bhorla-i quarter final asaya nung Kyrgistan nung asayar Diushebaev Nurzhigit koka semifinal-i iogo.

Arishi küm 26 tain India nung asayar yagi 51 Kg category asaya nung asaya 5-0 agi akok aser medal kabosa angutsü jangjaogo.

Hisar nungi boxer yagi Kyrgyz nung asayar ya akokba sülen kechi südir süaka bronze medal kabosa angutsü jangjaogo aser World Championships nung medal anguba India nung tebur asayar tibuba akümtsü.

2019 Asian Boxing Championships nung silver medal ngur alisang yagi iba asayamung kanga junga tenzük aser round of 32 nung Kazakhstan nung asayar Saken Bibossinov 5-2 agi akok. Bibossinov-i iba asayamung nung gold medal angutsü imla

liasü saka Deepak-i kanga junga asaya pa tsükdaktsüogo.

Deepak taruba asaya China nung asayar Jiamao Zhang den asayatsü.

Kasa asayamung nung Commonwealth nung bronze medal anaben tashi ngur aliba India nung asayar Hussamundin-i kanga meranga asayar Bulgaria nung asayar J Diaz Ibanez 4-3 ta split decision agi kokogo.

Maneni India nung asayar Nishant Dev-i Cuba nung asayar Jorge Cuellar unanimous decision agi kokogo.

Tang mezüngbuba India nung tebur boxer temi World Boxing Championships ka nung medal asem kidangi bener aotsü.

Taoba mapang India nung tebur boxer tem rongnung Vijender Singh (bronze 2009), Vikas Krishan (bronze 2011), Shiva Thapa (bronze 2015), Gaurav Bidhuri (bronze 2017), Manish Kaushik (bronze 2019), Amit Panghal (silver 2019) aser Akash Kumar (bronze 2021) nungeri iba asayamung nung medal ngur liasü.

BILEMDANGANG

"Yimjung nung linüra merumeru tesü."